

Emser Triumph auf Churer Boden

Der Churer Schnitzelbankabend ist ein Selbstläufer. Seit Jahren sind die Beizen ausverkauft. Um dem Traditionsanlass genügend Ehre zu erweisen, erzählt die «Südostschweiz» den Montagabend in klassischer Reimform.

Von Marco Hartmann (Reim und Bilder)



Die Emser «Buccas Bletschas & Ils Quacs da Domat», Highlight des Abends, lassen das Jahr in einem Rück-«Blick» Revue passieren (oben). Das Finale bildet die legendäre «Pizokel Kligga» bestehend aus Toni Membrini (links) und Hubi Pazeller.



Dr Föhn bloost dr um da Grind, ins Näscht hesch tua dini Kind. Schnitzelbank heisst hüt z'Programm. Im B12 gosch go fuuda – und d'Kliggena werden sorga für da nötig Fun.

Dr Afang machend d'Plättlirutscher mit luschtiga Piarhüat. Dank ihrna platta Reim wird bestimmt niamert müad. Dr Obig isch no jung, und dementsprechend gspannt au z'Publikum.

Sack zement, was isch denn das, ohweh? A Gugga ama Schnitzelbankobig, das hetma selta gseh. In d'Trompeta pushta und uf d'Trummla kicka, das bringt dia ganz Soundalag vum B12 krächzend zum erligga.

Noch däm luuta Intermezzo sorgen d'Schnitzelpunks für da nökshti Kracher. Mit ihrna gwürzta Sprüch sorgens für schüüchi, aber au vieli luuti Lacher. Wie sichs für ächti «Pönggs» ghört, schiissens uf Traditiona – und tüand d'Lüt mit Reimzettel verschona.

Au d'Schnudergoofa müand ohni Mikrophon usko, as paar usem Publikum tüand sich über da Techniker usloh. Doch dä Maa uf dr Bühni isch nit tschuld dasses tschätteret so brutaal, as isch doch nu dr Radio-Maa vum Regionaljournal.

D'Wasserrattana mitem Ushilfs-Musiker René sind jetz dra, z'Safranrisotto in da Mäga vum Publikum wird vum Lacha kräftig duragschüttlet. Au d'Boccalini wüssend z'überzüga: dia meishta lachend, als ob ma sie kützlet.

Dass Schnitzelbänkler au begnadeti Sängler sii könnnd, beweisend d'Emser vu da «Bucas e quacs». Für vieli sind sie z'Highlight vum Obig, als einzigi machends nit nur an Rück- sondern au an Usblick.

Söll do no eina säga, as fähli dr Schnitzelbank- Nochwuchs. Aber gell, as sind halt schu mehrheitlich dära uf dr Bühni mit wenig Hoorwuchs.

Dr Warnschuss wo vor dr Stadthalla abgfüüret worda isch, isch bi da Schmierläppa allsits präseints Thema und d' Sprüch sind hitzig wie Diskussiona in dr SRF Arena. Z'Dessert isch jetz denn parat, heiss lauft drum au dr Bohnawasser-Apparat.

D'Altmeischer vu da Nepomuk Gaschi mitem vorluuta Nani am Örgali, könnnd vor luuter Spielspass kurzerhand vergessa ihri Altersörgali.

Zum Grande Finale denn d'Pizokel-Kligga, mittlerwiila ghört ma d'Uhr kurz vor Mitternacht ticka. Doch für legendäri Puuraregla vum Hubi langts alleweil, dä Obig isch z'puura Gegateil gsi vu Langeweil!

Die fünf besten Schnitzelbänke 2017

«Alli Grossröt rüschands us mit Tablets, hei was das koschtet, eieiei. Drum muass a jeda d'Schualbangg trugga, keina kriagt do frei. Am End vum Grundkurs meldet sich vur BDP dr Grossrot Niggli – bi minera Tafla fählt a Schwämmli und a Kridastüggli.»
Boccalini

★ ★ ★ ★ ★

«Miar schlottren Knüü, dr Bus vu Chur isch do, mit minem Rollator schaffis nūma hinano. Z'Adrenalin am Stiega, as tuat pumpa varuckt mis Herz, bi sonara Busfahrt isch d'Formel 1 an schlechta Scherz.» Buccas bletschas & ils quacs da Domat

★ ★ ★ ★ ★

«Dr Poschtplatz gseht jetz andersch uus, dr Kreisel häns planiart, au ds Müürli vum Calanda-Gärtli wärd no amputiert. Korrekt verpackt, schickends das Teil dänn uf Amerika, döt gäbis eina, wo so Müürli schiinbar brucha kha. Dänn suufsch schu bald im Gärtli halt, diis Piarli ohni Müürli. Bi däm Verkehr ihisch das brandgföhrlig, und drum tüands natüürli für d'Pensionära vur Stadt Chur ganz z'vorderscht reserviara. Asoo hilft jedi Kollision, d'Pensionskassa z'saniara.»
Churer Schnudergoofa

★ ★ ★ ★ ★

«Strahlends Wetter, as isch a Pracht, St. Moritz hät d'WM gmacht. Für üs häts Medallia gschneit und öppa isch a Kamera vum Himmel kheit.»
Nepomuk Gaschi

★ ★ ★ ★ ★

«Witsch ussafinda, ob da Summer schön wird, für dä Zürcher Bruch gäbts eina, dä isch nit ganz dicht. Wür da meista Lüt vur Welt grad auno gfalla, wenn da Kopf vum Trump anstell vum Böök wür knalla.» Buccas bletschas & ils quacs da Domat

INSERAT

Eine exclusive Brille muss nicht teuer sein. Brille: **Fielmann.**

Fielmann zeigt Ihnen die ganze Welt der Brillenmode – zum garantiert günstigsten Preis. Denn Fielmann bietet Ihnen die Geld-zurück-Garantie. Sehen Sie das gleiche Produkt noch 6 Wochen nach Kauf anderswo günstiger, nimmt Fielmann die Ware zurück und erstattet den Kaufpreis.

Moderne Komplettbrille mit Einstärkengläsern, 3 Jahre Garantie. **CHF 47.50**

Sonnenbrille in Ihrer Stärke Metall oder Kunststoff, Einstärkengläser, UV-Schutz, 3 Jahre Garantie. **CHF 57.50**

www.fielmann.com **Fielmann**